

有惑集

〈乙巳開春述志〉

鳥鳴蝶舞翻書案，春日繁華正此時。醉墨龍蛇隨筆走，飛光日月暢神馳。
高門滿地遺芳草，石徑無人詠桂枝。何處妻兒何處止，且吟風雨且吟詩。

〈講堂〉

師生同室去何遙，懸隔鐘聲兩寂寥。故紙案前猶未解，抖音指上困無聊。
孤吟寂寂尋堂奧，眾苦茫茫羨折腰。飛夢流光爭半刻，任憑長夜雨蕭蕭。

〈書街〉

廿載萍蹤今一訪，書街晚暮夜燈殘。秋風不定搖蕭瑟，細雨無端雜苦酸。
鏡影離魂尋舊友，筆花別夢斷烏闌。行人竊笑迂生慢，手舞藍光不覺寒。

〈舊學〉

舊學窮途各落荒，燈窗自此別尋常。大招有淚芳魂亂，天問無聲汨渚涼。
獨上蘭臺風散絮，淹留畦徑月飛霜。一方逝水來還去，千載詩心是故鄉。

〈癸卯秋知某大學停招中文系有感〉

海風催上潮，谿雨一舟飄。逸韻書香老，多情舊路遙。
弦歌深杳杳，暮景寂蕭蕭。誰憶韶年夢，幽人賦大招。

〈臺北公會堂觀戲感懷〉

公會堂前爭獻酬，京胡頭角未能休。憑高標榜擅名士，懷遠淹留不繫舟。
百歲清風推雨過，一朝鉤鎖斷江流。喧囂鑼鼓笛聲偃，怎忍人間露染眸？

〈贈壽演〉

高士千山逸，懷人一紙書。紅塵譙然解，歸處共春蔬。

〈贈佳燕〉

沐猴多逐冠，幕燕獨擎天。今古問興廢，文章越九淵。

東京奧運有感五首

其一〈拍案〉

半桌封疆擰戰火，短兵方寸舞烽煙。強梁懼慎逢弱冠，老將奔騰追少年。
縱步騰波沉落落，靈球竄逸迅翩翩。何須旌獎揚光烈，片刻勳名幾世傳。

其二〈舉鼎〉

東京富嶽猶豪舉，揚臂扶搖駐二輪。玉骨冰肌經百鍊，纖腰靜女敵千鈞。
無雙勁挺傾天地，不二純誠役鬼神。淬體成金有直裰，解顏一笑見真淳。

其三〈旋舞〉

年少英雄藏市井，砥磨廿載壯心憑。騁風躍馬狂瀾湧，捲地翻龍逸氣蒸。
獨木騰凌如脫兔，雙環飄舉似飛鷹。孤峰已在羣山外，頂上青雲又一層。

其四〈迴燕〉

扶桑競起逐飛羽，鶯亂風迴更絕蹤。激箭狂飆穿鐵壁，銀針巧妙落危峰。
流星匿跡憑空嘯，墜露無端劍氣衝。豈待流金堪作證，壇場一霸自開宗。

其五〈凡俗〉

雨汗無邊隔世紛，春華一瞬待元勛。百傷幕下吞長淚，諸懶堂前笑不勤。
夢蝶爭光沾澤露，樂鼃坐井廢耕耘。今朝但許鯤鵬志，杳杳飄零幾片雲。

〈馬拉松賽前有感〉

遠路向桃源，千山一氣吞。流霞催疾走，朝露嘯長奔。
萬化澄心定，雙飛湧浪翻。脩途當有盡，蝶夢渺無痕。

〈若水堂熄燈有感〉

若水悠悠終有盡，書街盛夏已殘凋。浮沈翰墨誰惆悵，迢遞風騷自寂寥。
長鋏無彈鳴不斷，短歌低詠醉還消。一朝片月隨雲去，萬古明河逐夢遙。

〈和朱賢棣立春即事〉

寂寥但懼世間塵，華夏元宵不見人。
欲問蒼天覓張角，封疆萬里幾家春？

〈卯初避車流入城〉

牖戶微光染，惺忪靜夜過。折腰行客倦，長轍鬱雲多。
遠岳藏危塔，眠城曳淡河。奮身當一日，渺渺自相磨。

〈晨起講授莊子〉

莊生當踞鼓，笑我撫殘書。世道多迷蝶，講筵皆賦狙。
沉吟慚斥鴳，悵望活枯魚。桎梏安能解？珍藏此緒餘。

〈溪畔勤瘁〉

陰沉天迫午，案牘壓人低。仰羨仙人跡，迴流景美溪。
尖風秋颯颯，寒渚鳥淒淒。野菊依衰草，揚波蕩欲迷。

〈午後往臺灣大學圖書館訪書〉

翰苑鐘聲遠，山牆儼且深。煙雲沉醉月，霧雨步椰林。
訪古桃源隱，尋詩澤畔吟。浮華誰獨立？杳邈送遺音。

〈入夜經臺北高架橋而歸〉

細雨黃昏後，劬勞與怨兼。軒車圍畫閣，公路織天簾。
列宿人間散，孤鉤霧障潛。歸途盈倦客，奢願向微纖。

〈詠竹林君子〉

風流盈四海，涉世卻狂顛；把臂遣名教，銜杯任自然。
放遊嘲拾紫；酩酊意談玄；晦昧茫無路，途窮但問天。

〈憶阿媽〉阿媽仙去三年餘，孟冬忽憶頭七情景，近日天寒飄雨，有感而作。

阿媽長眠去，兒孫慟作句；愁煙環梵唄，眷念隔纖塵。
寂寂尋靈魄，芸芸是化身；蒼茫飛燕過，漫雨客中人。

〈遊宜蘭見村田白鷺有感〉

村田孤白鷺，斂羽望風行，壁立張千仞，雲高待一鳴。
空山人籟息，流水落花輕，振翼將何向？韶光雨又晴。

〈聽莊師說蔣捷〈虞美人〉有感〉

年少笑人愁，封窗不見秋；階庭連惡浪，江海一孤舟。
塵濁遊遷客，煙雲隱鳳樓，夕陽臨舊牖，歲酒酹東流。

八聲甘州〈深夜夢醒有感中文系停招〉

問霧花漫漫散連天，冬雨幾時乾？欲眠還復醒，夜闌扣寂，月落燈殘。
對鏡夢迷倦眼，垂首懶彈冠。馳走奔何急，四向驚寒。

也願登樓遠眺，仰止嗟未見，路斷行難。杳茫棲迷岸，枯硯凍無瀾。
羨東籬，閒居人境，醉南山，飲淚亦清歡。今誰識，逐飛花處，寥落無端。

臨江仙〈歲暮感懷〉次韻東坡夜歸臨皋

堂下生徒猶自醉，朝陽渾似殘更。
誰人吟嘯獨長鳴，銀屏流不應，滿室落無聲。

兩忘逍遙何不有？霽青自苦營營。
萍浮渺漫野雲平，軒窗飛鳥逝，不覺暮風生。

定風波〈送畢業生〉

稽古尋詩四載情，悠悠川逝片雲停。
從此振衣飛逸響，逐浪，醉迎風雨踏歌行。

誰道春光多繾綣？顧盼，韶華奔馬似流星。
浮世人情紛變幻，嚮晚，舊山翠谷別時青。

南鄉子〈憶往感懷〉

日暮僭名樓，翠谷遺風寄水流。歷載眷心多舊識，懷愁。晏晏韶光幾度遊。

倦起復還休，滄海何枝可繫舟？零雨浮雲飛不去，淹留。殘夢楓黃一片秋。

卜算子慢〈記庚子敦南誠品熄燈〉

飛霜未老，城柝已彫，往日少年沉醉。

遙望敦南，梅雨亂風初霽。洩流音，漫漫書香寄。

引愁思，當年若此，春殘半紙詩意。

顧戀留餘味，怎曠淡怡心？倏時人世。

夜落無聲，酒散但歸收淚。且塵埋，多少春秋裏。

向徹明，窗邊即景，又桃紅新翠。

江城子〈庚子梅雨有感〉次韻蘇東坡乙卯正月二十日夜記夢

百年孤島墜蒼茫。細思量，碧山忘。煙瘴連城，梅雨亦難涼。

但止扇搖開械巧，飛紫電，冷無霜。

蝶衣花鹿落何鄉？綺瓊窗，映殘妝。舊日清森，公路漫千行。

萬里黃霾空隔海，迷斷雁，向高岡。